

Maniitsumi tarnip nappaataanik katsorsaariaatsip siammarneqarnissaanut Naalakkersuisut peqquneqarnissaat pillugu apeqquteqaat aallaavigalugu oqallinnissamik siunnersuut.
(Inatsisartunut ilaasortaq Astrid Fleischer Rex, Demokraatit)

Akissuteqaat

(Peqqissutsimut Naalakkersuisoq, Agathe Fountain)

Inatsisartunut ilaasortaq apeqquteqaat aallaavigalugu oqallinnissamik siunnersuutaanut matumunnga qutsavigaara.

Tikkuarneqarpoq tarnikkut nappaatilinnut sullissinermut tunngasuni nutaamik eqqarsartaaseqarnissaq pisariaqartoq, tarnikkut peqqissuseq inuunermik nalilimmik inuuneqarnissamut pingaaruteqarluinnarmat – inunnut ataasiakkaanut, ilaqutariinnut inuiaqatigiinnullu – tamatumunngalu peqatigitillugu tarnikkut nappaatilinnik ullumikkut sullissinermut tunngasut nappaateqarfiit tamaviaarnarnersaannut ilaammata, kræfti inooriaatsimillu pissuteqartumik nappaatit naligalugit. Siunnersuutigineqarpoq suliassa qarfiit akimorlugit suleqatigiinnermi Maniitsumi tarnikkut nappaatilinni misilittakkat tarnikkut nappaatillit pillugit inatsisissamik suliagarnermi ilanngunneqarnissaasa eqqarsaatigineqarnissaa.

Taamatut isumaliuteqarnermut isumaqataavunga.

Tarnikkut nappaatillit sullinneqarneranni pingaarnertut anguniagaavoq tarnikkut nappaatillit pitsaanerpaamik inuuneqarnissaasa qulakkeerneqarnissaa.

Naalakkersuisut pingaartippaat tarnikkut napparsimasup qitiutinneqarnissaa, aammalu tarnip nappaataanik katsorsaannermi suliassa qarfiit akimorlugit suleqatigiinnerup ilagigaa. Tamanna aamma siunissaq eqqarsaatigalugu tarnikkut nappaatilinnut tunngasunik suliagarnermi pingaartinneqarluinnassaaq.

Tarnikkut nappaatilinnik ullumikkut sullissineq najukkani sulisut tarnikkut nappaatinik immikkut ilisimasallit, ulluinnarni tarnikkut nappaatilinnut atassuteqartartut tunngavigalugit iluseqarpoq. Ukiumut ikinnerpaamik ataasiarluni tarnip nappaataanik immikkut ilisimasalimmik nakorsaanermik tikeraartoqartarpoq, katsorsaanerullu ingerlaqqinnissaa pilersaarusiorneqartarluni. Pisariaqartitsineq naapertorlugu nakorsanit, Dronning Ingridip Napparsimavissuani tarnip nappaataanik immikkut ilisimasalimmit imaluunniit Nuummi tarnikkut nappaatilinnut sullissisut immikkoortotaqarfiannit ingerlaavartumik siunnersuisoqartarpoq.

Taakkua saniatigut Maniitsumi tarnikkut nappaatillit iluaqutigisimavaat, ukiorpaalunni upernaakkut ukiakkullu nakorsat tarnikkut nappaatinik immikkut ilisimasallit najukkamilu nakorsat taartaasartut aalajangersimasut atorfeqarsimanerat. Tamanna pissuseq pitsaasoq

katsorsaanissamut avatangiisinik pitsaanerpaanik pilersitsisimavoq, kommuni, politiit pinerluuteqarsimasunillu isumaginnittoqarfik qanimut suleqatigalugit. Pingaartumik pinerluuteqarsimasunik isumaginnittoqarfillu qanimut suleqatigiinneq iluaqutaasimavoq, napparsimasut eqqartuussaannikkut pineqaatissinneqarsimasut Maniitsumi amerliartormata.

”Maniitsumi periuseq” taamaammatt periuseq immikkoortuunngilaq, angusaavorli tarnikkut nappaatilinnik sullissinermi ullutsinni atuuttuni periarfissat atornerqarnerisigut, taamaattumillu napparsimasut pisariaqartitsinerat eqqarsaatiginerullugu taakkununga ajunnginnerpaamik iluaqutaasussaasoq.

”Tarnikkut nappaatilinnik sullissinermut tunngasut pillugit nassuiaat”-mi Naalakkersuisut UPA 2010-mi saqqummiussaanni tamanna qitiutinneqarpoq. Tarnikkut nappaatilinnik sullissineq tamakkiisoq inuiaqatigiinnilu ataqatigiinneri isigineqarput. Nassuiaammi ammasumik, ataqatigiissumik, sunnuteqarluartumik aammalu misilittakkanik tunngaveqartumik iliussissat arlalissuit kaammattuutigineqarput, pineqarlutittaaq pitsaaliuineq, nappaammik suussuser-siniarneq katsorsaanerlu.

Nassuiaammi pingaartinneqarpoq tarnikkut nappaatilinnik sullissinermi pingaarnerusut tamarmik nukittorsaavigineqarnissaat. Susasaqartut akisussaasut tamarmik annertunerusumik suleqatigiinnerat iliutsillu akulerutsinneqarnerat nassuiaammi kaammattuutit ilanngutsinneqarnissaannik sulinermi qitiutinneqalereerput.

Peqqinnissaqarfimmut tunngasuni isiginiarneqarpoq najukkani katsorsaanissamut periarfissat piginnaasallu aqqutigalugit najukkani suliniutit nukittorsarnissaat, kiisalu ungasianiit tarnip nappaataanik katsorsaasarnerep ineriartortinnerani tarnikkut nappaatilinnik ilisimasaqarluartut tikikkuminarnissaasa annertusarneqarnissaa.

Isumaginninnermut tunngasunik sulinermi isiginiarneqarpoq isumaginninnermi tarnip nappaataanut tunngasuni pisariaqartitat qulakkeernissaasa nukittorsarnissaat, pingaartumik ilinniagaqarneq, ineqarneq, suliffeqarnerlu imaluunniit tarnikkut anigorsinnaanngisaminnik imaluunniit sivisoorsuarmik napparsimasunut sammisaqartitsineq eqqarsaatigalugit.

Tarnikkut nappaateqartut sullinneqarnerannut tunngatillugu inatsisiliornermik suliaqarneq siviussaaq, siullertullu pingaartinneqassaaq napparsimasut piginnaatitaaffii pillugit nutaamik inatsisiliornerup salliutinneqarnissaa. Soorunami inatsisiliornerup ilusiatigut tarnikkut nappaatilinnik suleqatiginerisa sullinneqarnerisalu nukittorsarneqarnissaanni suleqatigiinneq pisariaqartoq eqqarsaatigineqassaaq.

Taamatut oqaaseqarlunga ilaasortat oqaaseqarnissaannut tunniuppara.